

## 惜字軒詩稿

### 00.序

余少小便離家求學，逮學成謀職，而去鄉愈遠。少年壯志，雖動思親之念，不以爲苦。中年哀樂，羈泊異鄉之感，與時俱切。常思歸鄉事親，而人隨事浮，終難如願。詩者，心之所之也。予於諷誦之際，常有興發，便抒摠己感，置諸篋中。今紬三十首，輯而成秩，以志余懷也。

### 01.~04.人體解剖生理學課堂觀摩大體解剖四首

#### 01.其一

爲究人軀微妙理，隨車遠赴北醫樓。沾衣絮雨飄前路，鎖塔鉛雲浥舊愁。  
靜室瓶間奇味漫，白牆窗隙怪聲幽。剖析顱頸聆詳解，忽覺凝寒遍四周。

#### 02.其二

顱圓頸短四肢長，血管神經臟腑藏。脈絡相連分客主，形神互補繫陰陽。  
皮毛骨肉含微理，肝膽心胸具妙章。氣息雖隨魂魄散，捨身贊道永留芳。

#### 03.其三

形骸暗蘊乾坤道，細剖微析治益焚。心統五官諸感繫，身含六慾眾情分。  
神經稠密如蛛網，血管糾連似籀文。目辨手抄疑未解，不知簾外日將曛。

#### 04.其四

悄立階前眺遠山，蒼茫盤古腹胸間。晚香裊裊升天府，新月依依映海關。  
萬載膚肌留沃土，億年血脈注清灣。捐軀遺愛襄醫理，長若繁星耀九寰。

#### 05.少年遊

少年意氣正昂揚，碧海騎鯨鼓浪長。筆接春秋存兩漢，詩驚風雨越三唐。  
雲霞散綺昏鴉亂，星月凝光嫩柳黃。千載騷人傳彩筆，高樓歌罷望蒼茫。

#### 06.風中詠花

涼飈顫翠枝，搖曳自生姿。眾草隨風偃，翻嘲瘦菊癡。

#### 07.雲

曾爲滄海波間水，化做巫山一段情。零落天涯何所止？偶然澤畔駐行程。

#### 08.春日郊行有感

春風吹綻舊時愁，紅遍山頭逐水流。縱得清濤將恨去，翻爲濁海浪難休。

#### 09.海畔思鄉

遠書歸夢兩茫茫，十載飄零暗自傷。西望雲天無盡處，山風海雨斷人腸。

10.驅車赴頭城應卯，念及平生事，自覺久客異鄉，一事無成，淒然傷懷。

山奔海赴載書隨，寥落晨星勉力追。捲地狂飈驚蝶夢，漫天飛絮惹蛛絲。青萍已逐秋風散，金穗仍依舊圃垂。西望嶺雲橫斷處，濤聲空咽楚魂悲。

#### 11.寓居海畔有感

卅年哀樂半征塵，拂盡落英沙滿身。大海狂濤驚旅夢，寒天殘月映歸津。朝雞有意迎新歲，暗蠶無聲待早春。眼底風霜何日盡？蒼茫煙靄沒星辰。

#### 12.暮春遊陽明山有感

行役他鄉逾十秋，暮春且作草山遊。已知殘夢隨風遠，但見群芳逐水流。滿路空凝金谷恨，一枝自綻紫臺愁。傷心望斷故園路，終日悲歌唱未休。

#### 13.夜半聞琴有感

且將今夜酒，消盡平日愁。今夜天星遠，月低西北樓。樓前清暉滿，倩影隨簾收。聆琴知纖指，聞歌識妙喉。豈無知音賞？羣蛙和沙洲。嗟予爲客久，身寄白雲浮。偶逢天上曲，暫駐不繫舟。廣寒樂音遠，空餘江畔鷗。曲終興未盡，又乘殘月遊。流光徘徊處，故園夢悠悠。把盞獨惜月，西望雪山頭。久客歸夢遠，常懷落葉憂。曉風動楊柳，那堪對清秋？飄蓬隨風轉，何日方得休？淚隨孤星隕，空房擁敝裘。

#### 14.夜雨

迴飈掃葉犬低鳴，星月無光眾蟻驚。龜島方傳雷隱隱，梅窗已響鐵錚錚。隨風傾灑庭間樹，順浪翻飛海畔城。千里飄蓬歸夢遠，燈孤髮白數蛩聲。

#### 15.登樓遣懷

簾捲西風又見秋，爲寬愁悶彊登樓。連山芒白隨雲變，映閣楓紅逐水流。久滯異鄉衾枕浥，常懷歸夢簡書稠。危欄拍遍吟新曲，日暮濤聲恨未休。

16.~19.己卯仲秋，南投地震，全台皆感。吾廬亦受波及，舉家外宿數月。數年之後，當時情景，猶歷歷在目，動心驚魄。爲七律四首，以抒感懷。

#### 16.其一

隱隱轟雷地底來，羣峯頃刻化塵埃。衢中華廈騰空舞，嶺上清湖坼地開。  
眾庶驚奔星夜下，滿村號泣竹林隈。更聞震後鄰莊苦，屋舍雞豚盡被埋。

#### 17.其二

傳言埔里山陵裂，集集中寮滿路哀。音訊已隨村徑斷，洪流又挾谷泥來。  
心驚對枕難留夢，膽破逢人總訴災。帳冷燈孤聲漸寢，終宵疏雨泣殘垓。

#### 18.其三

救死扶傷不遺力，塌樓餘震又聞災。數聲尚繞椽樑縫，一息猶存瓦礫堆。  
白燭銷心淚難禁，青燐戀月影空徊。鸞鈴夜夜無休止，引魄窺鄉望鏡臺。

#### 19.其四

屋毀垣殘坊巷改，何堪再撫幼時槐？蓬飄親舊難言聚，卦現蓍龜未忍猜。  
月映破窗松影亂，蛩鳴斷壁客心哀。童音稚語無尋處，秋盡冬來草木摧。

#### 20.螢

山巔水畔自徘徊，依草流光去復來。自是銀河隨雨墮，化成點點世間哀。

#### 21.春日遣興

青苔侵滿階前路，山色隨風入我廬。偶響輕雷非俗客，時傳芳氣乃新蔬。  
事經百代難爲史，酒盡三壺易作書。且飲一江春意暖，自來天地便寬疏。

#### 22.薰風

一曲春愁唱未消，南風又拂碧枝條。烏雲聚散青山外，豈識新荷待雨澆。

#### 23.憶昔

憶昔青矜年少日，尋章摭句慕風流。誤書一字凝新恨，苦誦千篇汲古愁。  
舊曲情深人罕問，今音意淺眾爭謳。誓將文采傳天下，賦罷長楊未肯休。

#### 24.~27.春遊峇里島四首

#### 24.其一

春風晚放百花開，乍暖還寒凍雨來。南島遙聞終歲暑，海灘夕照老椰栽。

#### 25.其二

人生地僻語難通，渺渺鄉園入夢中。夕照晨曦俱自海，潮來非是藉東風。

#### 26.其三

海天瀲灩碧無涯，點點輕帆向日斜。一曲笙歌舞不盡，更持殘盞醉流霞。

27.其四

潮來潮往世塵空，浩蕩群鷗向晚風。帆影何須耽夕照？清波皓月自無窮。

28.記中央大學羊蹄甲花

漫空緋雨溼人衣，芳徑中宵語漸稀。定是天仙隨手散，化成詩句又翻飛。

29.荷花池畔別友

風過荷塘百卉香，淺斟低唱醉斜陽。多歧世路君休問，日久他鄉是故鄉。

30.蝶戀花

霧散雲開花弄影，天水輕流，好夢終須醒。美酒悲歌唱不盡，滿樓蕭瑟秋園景。  
莫問清暉何日映？圓缺陰晴，豈仗人情定？偶駐眸光留桂影，斷雲浮結西山嶺。